

## Kalata gwa Pauli kwa Filimoni Isyakulongosya

Pauli aasimbile kalata ujũ kũ Nkilisiti jũmo unkwabi, ingamu jaake Filimoni. Untũmwa jũmo ugwa Filimoni, ingamu jaake Onesimo, aajongile. Kũmmaliikisyo alinkũja Nkilisiti, antũulaga Pauli bo aali mu nnyololo. Po leelo Pauli aalinngomwisye kwa Filimoni na kalata ujũ ukũnsũma Filimoni ukũnhobokela Onesimo, na paapo kũ lũlagilo lwa bunyafyale bwa Balooma aaliitikisiigwe ukũngoga untũmwa ujũ aajongile. Pauli ikũmbũula Filimoni ukũmmwambilila Onesimo untũmwa gwake ukũja gwamyabo mwa Kilisiti.

### *Uluponio*

<sup>1</sup> Kalata ujũ afumile kũmyangũ une Pauli, ne mbinyiigwe kũongwa jaa kũlũmbilila iNdũmi jaa Kilisiti Jesu, nikũkũsimbila ugwe Filimoni. Une nũ mwitiki mwiniĩtũ Timoti, tukũkũponia ugwe gwe nkũndwe gwitũ kangĩ mwiniĩtũ mu mbombo.

<sup>2</sup> Tukũmponia ugwamyitũ ndwitiko Apija nũ ndwabwite mwiniĩtũ Alikipo, na biitiki abaa nkĩpanga kya Kyala iki kikũkomaana mu nyumba jaako.

<sup>3</sup> Hliipyana nũ lũtengaano ukũfuma kwa Taata Kyala na kũ Ntwa Jesu Kilisiti, fijege na nuumwe.

*Ulugano nū lwitiko lwa Filimoni*

<sup>4</sup> Bwila bo ndi pakukusuumila kwa Kyala gwangu, ngugwa ulupi kumyake,

<sup>5</sup> paapo ngupilika inongwa sya lwitiko lwako ku Ntwa Jesu, nu lugano lwako ku bandu boosa abaa Kyala.

<sup>6</sup> Ngunsuuma Kyala ukuti ubulilanisi bwako ndwitiko na bandu abangi bubombege imbombo, ukuti usyaganie inunu syosa isi tukabile mwa Kilisiti.

<sup>7</sup> Gwamyitu ndwitiko, ulugano lwako luhobwisye fiijo nu kungasya, paapo usisangalwisye indumbula sya bandu baa Kyala.

*Pauli ikunsuuma Filimoni anhobokele Onesimo*

<sup>8</sup> Kunongwa ijo, nalinga mwa Kilisiti ndi nu bulagili ukukulagila isi kulondigwa ukubomba,

<sup>9</sup> leelo kunongwa jaa lugano, niiganile ukukusuma. Jo une Pauli, ne nkulu, kangi ndi mpinyigwa kunongwa jaa Kilisiti Jesu,

<sup>10</sup> ngukusuma kunongwa jaa mwanangu ndwitiko Onesimo,\* uju nunndumbiliile bo ndi mu nnyololo, ammwitiike Jesu.

<sup>11</sup> Akabalilo kamo, ujo akaabagiisye nafimo kumyako. Looli akabalilo aka, butuuli kuli twe babili, kumyako na kumyangu.

<sup>12</sup> Po leelo nikuntuma kangi kumyako, uju nunnganile ni ndumbula jangu joosa.

<sup>13</sup> Naaliiganile ukuti atugalege na niine, ukuti apyanilepo pamyako ukunduula, bo ndi mu nnyololo kunongwa jaa Ndami iNunu.

---

\* **1:10 1:10** Onesimo Ingamu iji kokuti *Uju abagiisye ukubomba simo.*

14 Leelo ngaalondaga ukubomba simo kisita bwigane bwako, ukuti ubombe inunu ku bwigane bwako, kisita kukufimbilisya.

15 Kingamo Onesimo aasookileko kumyako kukabalilo akanandi, ukuti iise agomokeleko kumyako pabungi, po gwise ujege nagwe bwila.

16 Ukwandila akabalilo aka, akaja ntumwa itolo,† looli ntumwa kangi gwamyitu, nkundwe, fijo kumyangu, kangi akindilepo kumyako, mbundu na mu Ntwa.

17 Po leelo, linga umbiikile une ukaja ndiilanisi, ummwambilile ujo ngati kunyambilila une.

18 Linga akubombiile simo imbiibi, pamo kummelela kamo, ummelelege une.

19 Jo une Pauli, nsimbile kalata uju ni kiboko kyangi jujuune, ngukuhomba. Kangi ndikujoba ukuti nungwe eli ni nongwa ijaa buumi bwako ukuhomba une.

20 Po leelo gwamyitu, umbombele isi kunongwa jaa Ntwa, gasangalusye indumbula jangu mwa Kilisiti.

21 Ngusimbiile isi, paapo ndumeenye ulwimiko lwako, kubomba ukukindapo isi njobile.

22 Pamopeene na isyo, undendekekesye ubujo bwa kufikilapo, paapo ngusubila ku nyiipuuto syinu, Kyala ikungomokesya kumyinu.

### *Uraponio lwa kumaliikisya*

23 Epaafula, uju apinyiigwe pamopeene na niine kunongwa jaa Kilisiti Jesu, ikukuponia.

---

† 1:16 1:16 *Untumwa itolo* Bala iisya *Untumwa* ku tsyakulingania.

<sup>24</sup> Kangi ababombeli biinangu Maalika, Alisitaliko, Ndema na Luuka, bikukaponia.

<sup>25</sup> Hliipyana Iya Ntwa Jesu Kilisiti Ijege pamopeene na nuumwe.

**Ulwikano Ulupya**  
**Nyakyusa-Ngonde: Ulwikano Ulupya (New**  
**Testament+)**

copyright © 2019 Wycliffe Bible Translators, Inc.

Language: (Nyakyusa-Ngonde)

Contributor: Wycliffe Bible Translators, Inc.

All rights reserved.

2020-11-30

---

PDF generated using Haiola and XeLaTeX on 18 Apr 2025 from source  
files dated 29 Jan 2022

14ff4521-53e4-562c-aacb-6f4faf55a6c8